

24. oktober

UKA2018/137

**Kingusinnerpaamik UKA 2019-mi Majoriaq pillugu naliliinermik saqqummiusseqqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut. Naliliinermi nassuiarneqassaaq innuttaasut ilinniniarnissaannut sulilernissaannullu piareersaasarnissaminut Majoriap siunertani qanoq naammassitigisimaneraa. Naliliinermut ilanngullugu aamma maannamut misilittakkat tunngavigalugit pitsaangorsaanissanut sipaarutissanullu siunnersuutit ilannguteqquneqarput.**

Demokraatit sinnerlugit Inatsisartuni ilaasortaq Nivi Olsen aaliangiiffigisassatut siunnersuutaa Siumumiik imaattumik oqaaseqarfigissavarput.

Siumumi anguniarparput inuusuttut ukiukinnerullutik iinniakkaminnik naammassisalernissaat, misissuinerup takutinnikummagu nunatsinni inuusuttut ilinniakkaminnik naammassinnittartut agguaqqatigiissillugu ukioqqortusivallaareerlutik naammassinnittartut.

Siumumi isumaqataavugut Majoriaq naliliiffiginissaanut piffissanngortoq, soorlutaaq atuarfik Ilinniarfissuarlu naliliiffiqarnikuusut. Naliliinerit taamaattut pittanngorsaaqqinnissamut periarfissiisarput akisussaaffimmillu annertunerusumik tunisisarlutik.

Meeqqat atuarianni naammassisartut ilarpassui ilinniarfinnut toqqaannaq ingerlaqqissinnaagaluarlutik Majoriaq aqutigeqqaartarpaat naak amerlasuutigit ilinniarfinnut allanut toqqaannaq isersinnaagaluarlutik tamannalu kinguarsaataasarpoq inuiaqatigiinnullu aningaasatigit annertuumik naleqartartoq qularutissaanngilaq.

Ilisimasagut naapertorlugit inuusuttuaqqat ilarpassuisa meeqqat atuarianni atuarnertik suli naammassinngitsoq unitsittarpaat ilaatigit angajoqqaatik aningaasatigit ikioqqaarnissaat siunertaralugu. Inuusuttuaqqalli ilaat atuagarsornikkut ima kinguarsimatigisarput allaat annertuumik tapersersorneqartariaqarlutik Majoriarlu tassaavoq taamatut inissisimasunut aamma qaffassaaqataasusaaq. Aammattaaq inuusuttuaraqarpoq inaarutaasumik meeqqat atuarianni karakterigissaarnissaq pingaarnarpaatinnagu atuarnertik naammassiniartarpaat Majoriaq isumalluutigalugu, soorunami tamanna ajuusaarnartuuvoq akuersaarneqarsinnaananilu. Taamaammat Siumumi isumaqarpugut inuusuttut ilinniarfinnik allanik tiguneqanngitsut kisimik Majoriamut ingerlaqqaartarnissaat periarfissaasariaqartoq, imaanngitsoq qinnuteqartut tamarmik Majoriami tinguorarneqartassasut.

Siumumiittaaq neriuutigaarput atuartitaanerup ilinniartitaanerullu ataqatigiissumik aqqissuuteqqinneranni Majoriap pisariaqartinneqarnera annikillisinneqassasoq. Taamaattorli aamma isumaqarpugut inersimasut inuunermi ingerlaqqikkusuttut karakterimikkullu qaffassaaqqikkusuttut imal. meeqqat atuarianni inaarutaasumik uppenarsaammik pigisaqalerusuttut Majoriami periarfissaqartariaqartut naammassinninnissamut. Nunatsinni taamatut inersimasunut Majoriaq aqutigalugu periarfissaqartitsineq pitsaasuuvoq nunanilu avannarlermioqatitsinnit nuannaartorineqarluni. Tassuuna Majoriamik pisariaqartitsineq tapersersussallugu Siumumiit peqataaffigerusupparput.

Ukiualuit matuma siornatigut Inatsisartuni siunnersuutimma ilaginikuuat inuusuttuaqqat meeqqat atuarfianni anisut naammassisullu tamarmik malinnaaffigineqartalernissaat nalunaarsorneqartarnissaallu. Siunnersuut akuerineqarnikuvoq, nuannerporlu Majoriaq aqqutigalugu kommuninit malinnaasoqartarmat inuusuttuaqqat qanoq inissisimanerannik pilersaaruteqarnerannillu.

Qinigaaffik kingulleq siusinaartumik pensionisiaqartarneq inatsisitigut aqqissuuteqqinneqarpoq, kingunerivaa siusinaartumik pensionisiaqartartut amerlasuut inuiaqatigiinni sulileqqinnissaat anguniarneqalermat, siunertaq tamanna anguniarlugu Majoriap annertuumik kivitseqataanera qularutissaanngilaq aammattaaq inersimasut ilinniareersimagaluarlutik qaffassaqqikkusuttut Majoriamik ikorfartorneqartarnerat qujassutissaavoq.

Siumup Inatsisartuutitaani ilisimavarput Majoriaq Ilinniartitaanermut Naalakkersuisoqarfimmit avissaartinneqarnikuunera ajornartorsiutaasartoq, taamaammat nalilersuinissamut ilanngullugu inissisimanerata naliliiffigineqarnissaa innersuussutigerusupparput.

Siumumiit Naalakkersuisut allannguutisatut siunnersuutaat akuersaarlugu Ataatsimiititaliami

Siumumiit taamatut oqaaseqarluta Naalakkersuisut allannguutissatut siunnersuutaata ataatsimiititaliamut susassaqartumut ingerlateqqinneqarnissaa innersuussutigaarput, ataatsimiititaliarlu sulilluarnissaanik kissaallugu.

Oqallilluarisilu

Doris J. Jensen, Siumut